


# DEN AMBIENTE

Fotos/Texto: Jan Poets

## CD "ON MY BACK" DI KING COMPUTER (Q.E.P.D.) A YEGA ARUBA..



\*\* E CD di e fayecido rey di roadmarch, KING COMPUTER, a yega Aruba. Manera ya ta conoci cu King Computer a realiza su grabacion pa e produccion aki y prome cu el a fayece el a sa di promove su hit promocional "Applause" riba nos radio emisoranan. Por a compronde cu ya for di aña pasa den luna di october King Computer a cuminsa cu su grabacion den Lake Recording Studio.

Riba e CD ta aparece; 1) On my back; 2) Anthem for the Caribbean; 3) Rochester Party; 4) Rastaman; 5) Nos Idioma; 6) Aruba; 7) Applause; 8) In There; 9) Boxing Competition;

10) Whith My Cat.

Tur e temanan ta ser compone pa e propio Julius Andrews "King Computer" y mayoria ta aregla pa Leonardo Lake, mientras e "Anthem For The Caribbean" a ser aregla pa Federico Martis, cual porcierto ta e cancion cu Julius Andrews a representa Aruba durante e CBU festival na Barbados.

DEN AMBIENTE por a compronde cu e CD aki ta obtenible na tur e disco tiendanan. Ta vale la pena pa tin e CD aki como un recuerdo inolvidable di King Computer y alaves lo sirbi como un sosten grandi pa su famia.

### Mayan Diadomingo pa 8'or pm.. SHOW TIME PA UN SOLO BIAHA NA C.S.S. CANAL 24..


\*\* For di nos gran amigo y colega Rino Kuiperi di e fantastico programa "SHOW TIME", nos a haya e informacion cu pa motibo cu Tele Aruba ta sumamente ocupa cu eventonan carnavalesco y tambe cu e futbol Copa di Oro, el a haye obliga di pasa su programa "Show Time" mayan diadomingo pa 8'or pm na C.S.S. canal 24. Durante e programa aki por disfruta di presentacionnan manera e.o. nos Calypso King Mighty Talent, Roadmarch King Long Roy, Lord Cachete y hopi mas. Pues bo ta keda cordialmente invita pa sintonisa C.S.S. canal 24 mayan anochi pa bo no perde e programa number 1 aki na Aruba cu ta "SHOW TIME"..

## CHRISTINA GONZALES REINA DI DEBBIE DOO SPEELSCHOOL..

*Bryan Helmeyer a bira Prins y Jacob Hennep ta e Pancho..*

\*\* Diahuebs DEBBIE DOO SPEELSCHOOL a organiza nan tradicional fiesta di carnaval, na unda nan a eligi nan reina den persona di Christina Gonzales, mientras cu Bryan Helmeyer a bira Prins y Jacob Hennep a resulta como e Pancho. E ambiente tabata tremendisimo cu animacion musical di e indiscutiblenan D2U 365 Brassband, kendenan a pone tanto e barbieenan como e mayornan wapa bay goal.

E prinsencitanan cu a participa ta como lo siguiente; Stacy Croes, Leandra Dijkhoff, Daniela Chica, Kiana de Lannoy, Natasha Tiphaine, Shanila Monzon, Oriana Carillo y naturalmente Christina Gonzales cu a logra di bay cu e titulo. Un pabien grandi ta bay pa e incansable directora di Debbie Doo Speelschool kende ta nada mas y menos e dama cu tin e sanger di carnaval den su ademan cu ta Debbie Merryweather.



\*\* E alumnonan di Debbie Doo Speelschool tabata super master disfraz..



\*\* Aki por aprecia Debbie Merryweather ta corona su reina Cristina Gonzales den presencia di ex Little Miss Universe Kiziah Arends actual Reina infantil di Tivoli Club, Prins Bryan Helmeyer y Pancho Jacob Hennep..

## CD CARNAVALESICO "ALONG THE HIGHWAY" DI QUA-SI BAYENDO MANERA "HOT DOG" CAYENTE...

\*\* E CD carnavalesco di Super Orquesta Qua-Si ta bayendo manera "hot dog" cayente, asina DEN AMBIENTE por a compronde for di Colochi Bikker kende ta e relacionista publico di Qua-Si.

E-produccion carnavalesco aki ta contene e dos super exitoso roadjamnan "Wapa E" di Nando Chirino y "Huppelen" di e macamba Reinier Mulder. Por bisa tambe cu e dos super exitoso roadjamnan aki ta den bataya fuerte pa ser e roadjam di aña 1998.

Tambe ta aparece riba e CD aki; Along The Highway (Tattoo), Chang Chines (Tattoo), Up High (Tattoo), Booty (Dito), V-Sign (Master Gusto), Bring Back (Tattoo) y Cruisin (Tattoo).

E produccion aki a ser graba den Aruba Recording Studio. Mayoria di e temanan a ser compone y aregla pa Chucho Hoek, cu excepcion di e cancion V-Sign cu a ser compone pa Master Gusto y aregla pa Hubert Thiel. E produccion aki a ser produci pa Chucho Hoek y Hubert Thiel.

DEN AMBIENTE por a compronde cu ainda tin algun di e CD na nos disco tiendanan, pero si bo ta interesa den uno, bo mester cumpra esaki awe mes!..

